

Pulau Payar, Kedah; 12 Januari 2020. Kebawah Duli Yang Maha Mulia, Al Aminul Karim Sultan Sallehuddin Ibni Almarhum Sultan Badlishah, Sultan Negeri Kedah Darul Aman telah mencemar duli mengadakan lawatan ke tapak projek menaiktaraf kemudahan Pusat Taman Laut Pulau Payar, Kedah pada pagi ini.

Pulau Payar adalah kaya dengan kepelbagaian spesies seperti karang keras, ikan karang dan invertebrata yang ada di antaranya hanya boleh dijumpai di Pulau Payar. Ianya juga adalah sebahagian daripada laluan penghijrahan ikan lumba-lumba dan paus pada masa tertentu setiap tahun.

Industri eko-pelancongan di Pulau Payar menyumbang sebanyak RM174 juta setahun kepada nilai Total Economic Value (TEV) yang dapat menjana pendapatan negara. Difahamkan lebih 1.1 juta pelancong mengunjungi Pulau Payar dalam tempoh 9 tahun kebelakangan ini di mana 70% daripadanya adalah pelancong asing.

Walaubagaimanapun, KDYMM Sultan bertitah untuk diadakan kajian "Carrying Capacity" secara berterusan dan dipertingkatkan bagi menetapkan bilangan pelancong yang datang sebagai pengurusan Taman Laut yang optimum. Di samping itu, kesan pembangunan dan pengurusan Pulau Payar perlu sentiasa dipantau dan dikaji semula dengan memberi penumpuan terhadap pemuliharaan sumber taman laut. Satu jawatan kuasa khas akan ditubuhkan segera bagi menilai dan mencadangkan kaedah penambahbaikan bagi pemuliharaan Pulau Payar.

Kakitangan Jabatan Perikanan Malaysia yang bertugas di Pusat Taman Laut Pulau Payar bertanggungjawab untuk melakukan tugas penguatkuasaan dengan menjalankan rondaan, menjalankan pemantauan pelancong, pemantauan terumbu karang, program pendidikan dan kesedaran awam serta lain-lain program.

Turut hadir sama dalam lawatan ini Yang Berhormat Dato' Ir Zamri bin Yusof, Pengerusi Jawatankuasa Kerja Raya, Bekalan Air & Sumber Air & Tenaga; Yang Berhormat Dato' Paduka Ammar bin Dato' Shaikh Mahmood, Setiausaha Kerajaan Negeri Kedah serta 25 delegasi Kerajaan Negeri Kedah serta Jabatan/Agensi peringkat persekutuan dan negeri.

Jabatan Perikanan Malaysia mengucapkan setinggi-tinggi penghargaan atas kerjasama Kerajaan Negeri Kedah dan Jabatan-Jabatan Kerajaan yang terlibat dalam usaha pembangunan pusat Taman Laut Pulau Payar dalam usaha memelihara sumber biodiversiti marin ke sebuah kawasan ekonomi yang dinamik.



